



**PERUTUSAN TAHUN BARU 2015**  
**KETUA PENGARAH PENJARA MALAYSIA**

---

**BISMILLAHIRAHMANIRAHIM**

**Assalamualaikum Warahmatullahi Wabarakatuh, Salam Sejahtera dan  
Salam 1Malaysia**

1. Alhamdulillah marilah kita memanjang kesyukuran ke hadrat Allah S.W.T. kerana atas limpah kurnia dan izinNya 2014 telah berjaya diharungi dengan penuh dedikasi dan jayanya. Di kesempatan ini saya mengucapkan selamat melangkah ke tahun baru kepada seluruh warga Jabatan Penjara Malaysia dengan tekad dan azam baru demi melaksanakan tugas yang telah diamanahkan.
  
2. Kita meninggalkan tahun 2014 dengan penuh kejayaan. Kegemilangan yang tercipta menunjukkan betapa kita terus relevan dan unggul sebagai sebuah organisasi koreksional yang berwibawa dan

profesional. Meskipun kita berbangga dengan pencapaian ini, tidaklah bermakna kita sudah boleh melepaskan sauh untuk berlabuh. Sesungguhnya tiada jalan singkat untuk kita sampai ke sesuatu destinasi yang sememangnya masih jauh, perjalanan kita melibatkan langkah demi langkah dan tingkat demi tingkat. Lantaran itu, perancangan yang tersusun perlu dilaksanakan agar kita dapat mengekalkan momentum kejayaan yang terus menjadi agenda utama jabatan dan dalam erti kata lain banyak lagi usaha yang perlu dilakukan bagi melonjakkan Jabatan Penjara Malaysia sebagai ‘Peneraju Perkhidmatan Korektif’.

3. Kehidupan kini yang bertambah kompleks menyumbang kepada kemasukan dan pembebasan tahunan yang semakin meningkat dari tahun ke tahun menjadikan bebanan dan tanggungjawab Jabatan Penjara semakin mencabar. Janganlah sesekali kita terleka dan terlena. Perlulah kita berada dalam keadaan siap sedia dalam memastikan tembok penjara terus mengawal dengan kukuh tanpa sebarang kejadian diluar jangka. Kawalan keselamatan di penjara perlu dipertingkatkan. Hari ini kita berhadapan dengan penghuni yang berbeza latar belakang jenayah termasuklah melibatkan keganasan antarabangsa, ideologi, berkumpulan dan terancang. Fenomena ini sudah pasti memerlukan kita melahirkan

tenaga kerja yang bukan hanya mahir dalam tugasannya harian tetapi mempunyai semangat waja, kental dan berfikiran positif dalam segala bentuk tindakan. Lantaran itu, suka saya tegaskan, pengukuhan pemulihan kepada penghuni perlu diperkasakan dari dalam hingga ke luar tembok penjara. Jabatan Penjara Malaysia terus optimis agar pemenjaraan diluar tembok terus diperluaskan dan program pemulihan didalam tembok terus diperkuuhkan.

4. Pemindahan banduan antarabangsa antara Malaysia dan negara akan dilaksanakan pada tahun 2015. Setakat hari ini sembilan negara iaitu Iran, Latvia, Bulgaria, Azerbaijan, Filipina, Romania, Turki, Arab Saudi dan Korea Selatan telah menyatakan minat untuk menyertai proses pemindahan banduan selepas Rang Undang-Undang Pemindahan Antarabangsa Banduan diluluskan pada 2012. Begitu juga Pindaan Rang Undang-Undang Penjara bagi melaksanakan pemindahan tersebut turut diluluskan oleh Parlimen pada 2014. Lantaran itu kita perlu bersedia melaksanakan program ini agar dapat berjalan dengan lancar serta memberi impak kepada kerajaan dan rakyat.

5. Saya juga percaya setiap Bahagian, Unit dan Insitusi Penjara telah menjalankan tanggungjawab yang sebaik-baiknya serta memenuhi segala prosedur dan peraturan yang telah digariskan. Usaha untuk meletakkan jabatan ini di aras kecemerlangan, memerlukan kerjasama yang menyeluruh oleh setiap kakitangan dimana memerlukan persefahaman dan kesetiaan sebagai satu pasukan termasuklah pegawai awam yang ditempatkan di Jabatan Penjara Malaysia telah mewarnai dan menyumbang kepada perubahan landskap perkhidmatan pemulihan di penjara. Sesungguhnya tanggungjawab kita adalah satu amanah dan setiap peruntukan kewangan yang dibelanjakan adalah membawa harapan tinggi rakyat terhadap kita dalam memberikan perkhidmatan yang terbaik kepada mereka.

6. Saya tidak menyangkal tanggungjawab ini bukanlah sesuatu yang mudah, namun didalam kepayahan tersemat kemuliaan hati. Sesungguhnya membimbing seseorang kearah kebaikan adalah sesuatu perkara yang mulia dan terpuji.

**Firman Allah yang bermaksud:**


**"Hendaklah terdapat antara kamu segolongan yang menyeru dengan kebaikan dan mencegah daripada kemungkaran. Itulah golongan yang berjaya. (Surah Ali-Imran, ayat 104)**

7. Sesungguhnya bakti dan sumbangan segenap lapisan kakitangan Jabatan Penjara adalah amat penting dan bermakna kepada saya dalam membangunkan jabatan ini serta menghadapi berbagai cabaran yang mendarat.
  
8. Di kesempatan ini saya mewakili seluruh warga Jabatan Penjara Malaysia amat berterima kasih kepada semua pihak termasuklah agensi-agensi kerajaan, swasta, Badan-Badan Bukan Kerajaan (NGO) serta individu yang sentiasa memberi sokongan padu dalam program-program pemulihan. Segala kerjasama yang diberikan amat bermakna dan menyumbang kepada pembangunan program pemulihan di Jabatan Penjara Malaysia. Kami di Jabatan Penjara Malaysia sentiasa membuka pintu dan mengalu-alukan sebarang cadangan yang membina daripada semua pihak demi memperkasakan program pemulihan di Jabatan Penjara Malaysia.

9. Akhir kata, semoga dengan keikhlasan, komitmen, kesungguhan yang disatupadukan mendapat keberkatan Allah S.W.T serta membawa kebaikan bersama. Saya sekali lagi mengambil kesempatan ini mengucapkan ribuan terima kasih kepada seluruh warga Jabatan Penjara Malaysia dalam memastikan Jabatan ini sentiasa berada di atas landasan perkhidmatan yang betul dan seterusnya mengekalkan kecemerlangan pada tahun lalu.

**Sekian, Wabillahi taufiq walhidayah, wassalamualaikum  
warahmatullahi wabarakatuh.**

**Sekian, terima kasih.**



**(KJP DATO' SRI HAJI ZULKIFLI BIN OMAR)**